

't Herenhoentien



BESTE KIENDER!

Vandaag is et prachtig haastweer. As we deur de raemen kieken, zien we allemaole blatties in alderhaande prachtige kleuren. Hiel vule zitten d'r nog an de bomen, mar hiel vule blatties bin ok al van de bomen ofvalen. Aj' daor deurhenne lopen risselen die zo hatstikke mooi. Hier en daor liggen dikke bulten mit blad die bi'j mekaander veegd binnen. Hebben jim dan ok altied zoe'n zin om daor es lekker in omme te schoppen? Grote meensken vienen dat niet goed, aenlik mag et niet, mar toch...

Al genietende van al dat moois butendeure schöt oons inienen wat in de zin. Valende blatties, overal ekkels en ere neuties, et is haast, mar... Blikstiender! Et is waor ok, et is haast, en in de haast zorgen we altied veur 't Herenhoentien. Et schoelekraantien 't Herenhoentien, veur alle Stellingwarver kiender die in groep 1, 2, 3 of 4 zitten. Dat kraantien had al lange klaor wezen moeten!! Huplakee, mitien an et wark!!

Now, kiender, gelokkig is jim kraantien now klaor. Alliend hebben we dit keer gien verhaeltien over Piepmoes. Waoromme niet? Now, dat zit ziezo:

Een posien leden is d'r een hiel mooi ni'j kienderboek schreven. Dat boek hiet de Hollebomebos en et is schreven deur Herma Stroetinga. Herma het dat allemachtig mooi daon. Zó mooi, dat we in dit kraantien twee verhaelties uut dat boek plaetsen. En wie van jim nog méér verhaelties heuren willen, now dat kan. Alle schoelen, ok die van jim, hebben zoe'n mooi boek kregen. Zodat jim juffen en meesters ok de aandere verhaelen uut dat boek an jim veurlezen kunnen.

In et boek staon allemaole verhaelties over de keboolterties Pim en Pamme, Knienegien Snuffel, Harrie Haeze, Slobber de Ente en nog veul meer dieren. Ze beleven alderhaande spannende aeventuren. Mar soms kriegen ze last van een hekse. Die hekse hiet Krakkemikka, en oei, oei, wat kan die hekse oervervelend wezen. Now ja, luuster mar es goed as juf of meester jim een peer van de verhaelen veurlest! Hiel vule plezier mit 't Herenhoentien én mit de kleurplaete, van... juist: Krakkemikka!

't Herenhoentien is veural bedoeld veur groep 1 t/m 4 van et basisonderwies in de Stellingwarven en verschient vier keer in et jaor. Et wodt bedocht en klaormaekt deur Sietske Bloemhoff en Géry Scholten van de Stichting Stellingwarver Schrieversronte in Berkoop (info@stellingwarfs.nl, www.stellingwarfs.nl)

Et speelgoedautogien

Op et pad naor et bosmeertien staon de keboolters Pim en Pamme en Knienegien Snuffel om een rood, glimmend speelgoedautogien henne.

Omdat d'r daar vaeke heiten en memmen mit heur kiender kuieren, daenk ik dat een joongien dat autogien verleuren het.

'As ik dat zo bekiek, dan passen wi'j d'r percies in,' zegt Pim.

'Kiek es jonges, de deurties kun los en d'r zit een stuurtien in dat echt dri'jen wil,' ropt Pamme.

'Zol die auto ok echt rieden willen?' snoft Knienegien Snuffel.

'Tuurlik niet, Snuffel. 't Is toch zeker gien echte auto.'

'Dat weet ik ok wel, heur. Kroep d'r es in, Pamme.'

Dat lat Pamme him gien twie keer zeggen.

Hi'j stapt in en ie kun et geleuven of niet, keboolter Pamme past percies op et autostoeltien.

Trots dri'jt hi'j an et kleine stuurtien.

'Geef mi'j es een flinke drokker, jonges,' ropt sjefeur Pamme.

Keboolter Pim en Knienegien Snuffel drokken zo hadde as ze kunnen tegen et rooie autogien an en... ja heur, ze kriegen him in beweging!

Pamme ridt! Hiel eigenwies kikt hi'j om him henne!

Mar dan inienen raost hi'j: 'Niet zo hadde! Niet zo hadde!'

Pamme daenkt dat zien vrunties nog de hieltied an 't drokken binnen, mar dat is niet zo!

Pim en Snuffel staon mit eupen mond en bange ogen de auto mit Pamme d'r in nao te kieken.

Pamme is schietenbenauwd!

Want et pad lopt wat naor beneden en gaot recht op et Bosmeertien an!

'Mem! Mem!' raost Pamme.

'Trek an 't stuur!' ropt bruurtien Pim.

Pamme dri'jt ok wel an et stuur, mar dit speelgoedautostuurtien warkt niet goed!

Slobber, de ente, zicht et allemaol gebeuren.

En wat dot die dikkontente!

Hi'j kropt tegen de kaant van et meertien op en gaot midden op et bospad staon.

Mit een klap botst et autogien mit Pamme d'r in tegen die dikke, vette slobberente an.

'Kom d'r mar gauw uut, Pamme jong.'

Hee, Pamme zit d'r hielemaole niet meer in! Waor is die now bleven?!

Keboolter Pim en Knienegien Snuffel kommen et pad opdraeven!

Ze wiezen naor et meer!

Die Pamme!

Hi'j is mit een grote boge uut et autogien slingerd! Zo et waeter in!

En daor staot hi'j. Tot zien boek an toe in et koolde waeter.

Gauw ploont Slobber et waeter in, gript et kebooltertien beet en zet et op de wal, tussen zien vrunties.

'En now drekt op huus an om dreuge kleren. Aans woj' nog ziek ok!'

'Doe ik. En Slobber nog bedaankt veur 't redden, hen Slobber,' bibbert Pamme nog nao van et benauwde aeventuur dat as hi'j beleefd het.

Kletspute

Knienegien Snuffel, Harrie Haeze en Ties Stiekelvarken zitten onder de brummelpolle vlakbi'j et huus van Krakkemikka de hekse.

Snuffel en Harrie hebben allebeide een grote flesse waeter veur heur staon.

'Klaor of!' ropt Ties.

Zonder te stoppen drinken ze heur flesse leeg.

Harrie beveelt: 'Kom mit, Snuffel. Naor et heksehuus.

En Ties, as Krakkemikka naor buten komt, dan hadde op je fluitien blaazen, hen?'

'Komt veur de bakker!' gniest Ties.

Mit heur dikke waeterboekies draeven de beide drinkers zo hadde as ze kunnen naor de veurdeure van de hekse.

Daor staon die heur leerzen.

Gifgrune joekels! Knienegien Snuffel en Harrie Haeze gaon elk vlakbi'j een leerze staon.

En wat doen die kleine smeelappies?

Ze tillen as een hontien ien potien omhogens en piesen heur hielemaole leeg in de leerzen van de hekse!

Ze bin d'r nog mar krek klaor mit as ze heuren van 'prrrrrt', 'prrrrrt'.

Dat is et fluitien van Ties Stiekelvarken!

Ties zicht vanuut de brummelpolle et kwaoie gezicht van hekse Krakkemikka veur et raem.

Harrie Haeze en Knienegien Snuffel stoeven vot!

As ze even laeter veilig bi'j Ties in de brummelpolle zitten, zien ze Krakkemikka naor buten toe kommen.

Op sokken.

'Hee, lillike rotjongen, wat moet dat hier!' raost de hekse.

Die kriesende hekse maekt de drie vrunties bange!

Mar dat duurt niet lange, want inienen beginnen ze te schuddeboeken van 't lachen!

Want wat gebeurt d'r?

Krakkemikka stikt eerst heur linkervoete in een leerze en dan heur rechter!

'Wel heremientied nog an toe!' schrikt ze. "'t Het, geleuf ik, waarm waeter regend!'

Gauw dot ze de leerzen uut.

Harrekrastes! Mien sokken stinken naor pies!'

Dan kikt de hekse woest naor et brummelbossien!

'Hee, dikke varkenkoppen!

As ik jim te pakken krieg, bin jim nog niet jaorig!'

Op heur natte stinksokken sopt de hekse heur huus weer in.

Onder de brummelpolle rollebollen ze over mekaander henne van et lachen.

'De hekse het een kletspute, de hekse het een...'

'Prrrrrt, prrrrrt!'

't Is voldaolik moesstille!

'Schrik mar niet,' zegt Ties Stiekelvarken, 'de hekse het gien kletspute, de hekse het een piespote!'

De naemen van dieren in et Stellingwarfs

In de verhaelen over de beide kebooters Pim en Pamme kommen nogal wat dieren veur. In et Stellingwarfs bin die naemen krek een betien aandere as in et Nederlaans.

Luuster mar es: eerst heuren jim de naeme in et Stellingwarfs. Kun jim raoden welk dier daor mit bedoeld wodt? Soms is et best wel een betien muulik. As jim et niet weten of raoden kunnen, vertelt juffer of meester wel welk dier bedoeld wodt, heur!

Stellingwarfs

knienegien
ente
kalfien
peerd
stiekelvarken
geite
haeze
hond
katte
moes

Nederlaans

konijntje
eend
kalfje
paard
egel
geit
haas
hond
kat
muis

**ZUUK
DE
ACHT
VERSCHILLEN**

Dit keer hebben we gien verhaeltien over Piepmoes. Dat komt de volgende keer wel weer. Mar jim zien hieronder wel twee tekenings. Ze lieken een boel op mekere, en toch zitten d'r acht verschillen in. Kun jim die acht verschillen vienen?





KRAAKKEMIKKA KLEURPLAETTE
(1/4 Herenhoentien, 2007)